



Adresa: **Ul. Hamdije Ćemerlića 39 a**
71000 Sarajevo
<http://www.voda.ba>

tel. +387 33 726-444
fax. +387 33 726-423
e – mail: info@voda.ba

Broj: UP-I/25-1-40-200-12/21

Datum: 22.07.2021.godine

«Agencija za vodno područje rijeke Save» Sarajevo, rješavajući po zahtjevu pravnog lica JP Autoceste Federacije BiH d.o.o. Mostar, za donošenje rješenja o prethodnoj vodnoj saglasnosti za izgradnju lokalne saobraćajnice za Begov Han i Kovaniće od spoja sa magistralnom cestom M17 do uklapanja sa trasom postojeće lokalne ceste, uključujući i most preko rijeke Bosne, a u sklopu izgradnje autoceste na koridoru Vc: dionica Poprikuše – Nemila, na osnovu člana 109. stav (1) tačke 9. i 10. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98, 48/99), **d o n o s i**

R J E Š E N J E **o prethodnoj vodnoj saglasnosti**

1. Pravnom licu JP Autoceste Federacije BiH d.o.o. Mostar daje se prethodna vodna saglasnost za izradu projektne dokumentacije za izgradnju lokalne saobraćajnice za Begov Han i Kovaniće od spoja sa magistralnom cestom M17 do uklapanja sa trasom postojeće lokalne ceste, uključujući i most preko rijeke Bosne, u sklopu izgradnje autoceste na koridoru Vc: dionica Poprikuše – Nemila a u postupku pribavljanja urbanističke saglasnosti.
2. Prethodna vodna saglasnost se daje na osnovu pregleda dostavljene dokumentacije, utvrđenog činjeničnog stanja i pod slijedećim uslovima:
 - 2.1. Izraditi i revidovati investiciono-tehničku dokumentaciju na nivou potrebnom za građenje u kojoj će se dati tehnička rješenja prikupljanja, tretmana i konačne dispozicije oborinskih brdskih i zaobalnih voda te način ukrštanja ceste sa rijekom Bosnom, u cilju eliminacije negativnih uticaja po režim tečenja, koji nastaju kao posljedica izgradnje ceste sa pratećim objektima.
 - 2.2. Investiciono-tehnička dokumentacija treba biti izrađena i revidovana od strane pravnog lica koje ima ovlaštenje izdato od strane Federalnog ministarstva poljoprivrede, vodoprivrede i šumarstva (lista «A») a sve u skladu sa članom 5. stav (2) Pravilnika o sadržaju, obliku, uslovima, načinu izdavanja i čuvanja vodnih akata («Službene novine Federacije BiH», broj 31/15, 55/19 i 41/20).
 - 2.3. Za izradu projektne dokumentacije za lokalnu saobraćajnicu i most preko rijeke Bosne, koristiti zvanične podatke o velikim vodama rijeke Bosne pribavljene od «Agencije za vodno područje rijeke Save» Sarajevo.
 - 2.4. U sklopu projekta treba dati hidrološki proračun kojim će se definirati količine vode koje se mogu pojaviti u formi oborina, povremenih ili stalnih površinskih tokova koje je potrebno regulisati, odnosno propustiti ispod trupa saobraćajnice (propusti i mostovi) i osigurati bezbjedno oticanje.
 - 2.5. Za sva planirana ukrštanja sa stalnim i povremenim vodotocima (propusti i mostovi), se u projektnoj dokumentaciji trebaju dati proračuni i rješenja koja se odnose na geometrijske karakteristike i veličinu otvora uvažavajući propise o vodama i uobičajenu inženjersku praksu. Sa vodoprivrednog aspekta, kota donje ivice konstrukcije mosta treba da bude viša za 1,2 m u odnosu na kotu velike vode ranga pojave jednom u sto godina (1/100). Obalni upornjaci mosta, u odnosu na prirodni poprečni profil korita rijeka Bosne, trebaju imati takav položaj da u najmanjoj mogućoj mjeri smanjuju širinu prirodnog korita. Za propuste je, kao mjerodavan, propisan kriterij da isti trebaju propustiti velike vode ranga pojave jednom u sto godina sa slobodnim prostorom iznad nivoa velike vode od 25% od površine otvora propusta.
 - 2.6. U projektnoj dokumentaciji definisati lokalitete pozajmišta materijala sa kojih će se dovoziti materijal za trup ceste, odnosno lokalitete na kojima će se odlagati višak materijala iz iskopu. Nije dozvoljeno deponovanje materijala na obale vodotoka i u vodnom dobru.

Deponovanje materijala rješavati na način da se ne remeti prirodni režim površinskih i podzemnih voda.

- 2.7. U postupku izrade projektne dokumentacije zatražiti mišljenje stručnih službi Grada Zenica, koje se odnosi na trasu ceste u odnosu na položaj zaštitnih zona postojećih i planiranih izvorišta vode za piće i na osnovu dobivenih podataka provesti analizu mogućeg negativnog uticaja ceste u toku njene izgradnje i korištenja kao i eliminiranje/ minimaliziranje tih uticaja na kvalitativno-kvantitativni režim voda na izvorštima.
- 2.8. Sagledati sve moguće neželjene uticaje na planirane objekte za zaštitu od štetnog djelovanja voda i zaštitu voda kao i planiranih objekata i postrojenja na druge objekte i postrojenja, stečena prava korisnika, postojeću infrastrukturu, naselja i slično te dati prijedlog mjera za sprječavanje tih uticaja u toku izgradnje i korištenja istih uključujući i standardne i dodatne mjere zaštite.
3. Po izradi projektne dokumentacije, u skladu sa uslovima iz tačke 2. dispozitiva ovog Rješenja, korisnik prethodne vodne saglasnosti dužan je da ovoj Agenciji podnese zahtjev za izdavanje vodne saglasnosti.
4. Zahtjev za izdavanje vodne saglasnosti dostavlja se u skladu sa članom 8. i 19. stav (2) Pravilnika o sadržaju, obliku, uslovima, načinu izdavanja i čuvanja vodnih akata.
Uz zahtjev se prilaže :
 - 4.1. Revidovana Investiciono-tehnička dokumentacija zahtijevana tačkom 2. ovog Rješenja.
 - 4.2. Rješenje o urbanističkoj saglasnosti za predmetnu dionicu autoceste.
 - 4.3. Dokaz o izvršenoj uplati upravne takse u iznosu od 60 KM.
5. Prethodna vodna saglasnost se, u skladu sa članom 111. stav 3. Zakona o vodama, daje sa rokom važenja od 3(tri) godine od dana pravosnažnosti ovog rješenja.
6. Ukoliko, nakon izdavanja ove prethodne saglasnosti a u toku pripreme dokumentacije za podnošenje zahtjeva za izdavanje vodne saglasnosti, nastupe okolnosti za koje se može pretpostaviti da mogu biti od uticaja na rješavanje zahtjeva za donošenje rješenja o vodnoj saglasnosti, nosilac prava iz prethodne vodne saglasnosti dužan je o nastanku tih okolnosti obavijestiti ovu Agenciju.
7. Ovu prethodnu vodnu saglasnost Investitor će koristiti u postupku pribavljanja urbanističke saglasnosti i ona definiše sve uslove koje Investiciono-tehnička dokumentacija treba da ispuni za pribavljanje vodne saglasnosti, a sve u skladu sa Zakonom o vodama, Pravilnikom o sadržaju, obliku, uslovima, načinu izdavanja i čuvanja vodnih akata i Uredbom o uslovima ispuštanja otpadnih voda u okoliš i sisteme javne kanalizacije.

Obrazloženje

Služba za urbanizam Grada Zenica obratila se, po službenoj dužnosti, ovoj Agenciji dana 05.05.2021. godine sa zahtjevom za izdavanje prethodne vodne saglasnosti za izgradnju lokalne saobraćajnice za Begov Han i Kovaniće od spoja sa magistralnom cestom M 17 do uklapanja sa trasom postojeće lokalne ceste, uključujući i most preko rijeke Bosne, a u postupku izdavanja urbanističke saglasnosti po zahtjevu JP «Autoceste FBiH» d.o.o. Mostar.

U provedenom postupku, uz zahtjev za izdavanje prethodne vodne saglasnosti dostavljena je i pregledana slijedeća dokumentacija:

- kopija Rješenja o izmjenama podataka o upisu u sudski registar, broj: Tt-O-840/18 izdatog 15.11.2018. godine od strane Općinskog suda u Mostaru;
- kopija Uvjerenja o poreznoj registraciji, izdatog dana 07.02.2013. godine od strane Porezne uprave – Kantonalni porezni ured Mostar;
- kopija Uvjerenja o registraciji/upisu u Jedinstveni registar obveznika indirektnih poreza, broj: 04/1-17/1-UPJR/1-630-2/19 izdatog 01.02.2019. godine od strane Uprave za indirektno-neizravno oporezivanje Banja Luka,
- Idejni projekat Autocesta na koridoru Vc, sekcija Poprikuše – Nemila, Lokalne i druge saobraćajnice, knjiga B1011 – Lokalna cesta 2 (put za Begov Han), YUKSEL PROJE Ankara, SARAJINZENJERING Sarajevo,

- Informacija po Obavještenju o zahtjevu JP Autoceste Federacije BiH za izdavanje prethodne vodne saglasnosti za izgradnju lokalne saobraćajnice za Begov Han i Kovanice, broj: 07-17741/21 upućena ovoj Agenciji 03.06.2021. godine od strane JP Elektroprivreda BiH d.d. Sarajevo,
- Dokaz o uplati administrativne takse za izdavanje vodnog akta.

Nakon izvršenog uvida u dostavljeni zahtjev i priloženu dokumentaciju utvrđeno je da uz zahtjev nisu dostavljeni svi potrebni prilozi, te je od podnosioca zahtjeva, dopisom broj: UP-I/25-1-40-200-2/21 od 12.05.2021. godine zatraženo da zahtjev dopuni. Dokumentacija je kompletirana (dostavljeni svi potrebni prilozi) 28.05.2021. godine, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

U skladu sa članom 124. stav (1) Zakona o vodama i člana 1. Pravilnika o izmjeni i dopuni pravilnika o sadržaju, obliku, uvjetima, načinu izdavanja i čuvanja vodnih akata («Službene novine FBiH» broj 41/20) o predmetnom zahtjevu je dana 31.05.2021. godine, obavještena javnost putem obavještenja u dnevnom listu «Oslobođenje» i na oglasnoj ploči «Agencije za vodno područje rijeke Save» Sarajevo. U datom roku stiglo je jedno izjašnjenje JP Elektroprivreda BiH d.d. Sarajevo o aktivnostima iz zahtjeva u kojem nas, u svojstvu zainteresovanog lica a u cilju izbjegavanja eventualne kolizije, obavještavaju da je u završnoj fazi izrada Idejnog projekta HE Kovanići za koju su od ove Agencije, u postupku ishodovanja urbanističke saglasnosti, dobili Rješenje o prethodnoj vodnoj saglasnosti (broj: UP-I/25-1-40-222-4/15 od 19.06.2015.godine).

U cilju utvrđivanja činjenica bitnih za odlučivanje u ispitnom postupku od podnosioca zahtjeva je, dopisom broj: UP-I/25-3-40-200-7/21 od 14.06.2021.godine zatraženo očitovanje u pogledu usaglašenosti planirane trase lokalne saobraćajnice sa projektnom dokumentacijom za HE Kovanići i prostorno planskom dokumentacijom. Isti dopis upućen je 22.06.2021. godine i Službi za urbanizam Grada Zenica.

Dana 12.07.2021. godine JP «Autoceste FBiH» d.o.o. Mostar dostavilo je svoje Očitovanje dok se Služba za urbanizam Grada Zenica nije očitovala.

Iz dostavljenog očitovanja JP «Autoceste FBiH» d.o.o. Mostar može se zaključiti sljedeće:

Za izradu projektne dokumentacije za autocestu Vc dionica Poprikuša Nemila, kao i lokalnu saobraćajnicu za Kovaniće uključujući i most preko rijeke Bosne, projektant je koristio zvanične podatke o velikim vodama rijeke Bosne koje je dobio od «Agencije za vodno područje rijeke Save» Sarajevo (broj: 10-300-2/21 od 16.03.2021. godine).

Za izradu projektne dokumentacije za HE Kovanići projektant je radio sopstveni proračun velikih voda prema kojem su velike vode povratnog perioda 1/100 godina za 530,14 m³ veće od zvaničnih podataka «Agencije za vodno područje rijeke Save» Sarajevo.

Sektor za upravljanje vodama (sektor 10) ove Agencije dao je svoje očitovanje vezano za mjerodavne velike vode rijeke Bosne na predmetnom lokalitetu.

Uvidom u Informacioni sistem voda konstatovano je da se Rješenje o prethodnoj vodnoj saglasnosti broj: UP-I/25-1-40-222-4/15 od 19.06.2015. godine odnosi isključivo na obavljanje geološko – geotehničkih istraživanja za potrebe HE Kovanići u Topčić Polju, odnosno lokalitetu Donji Ligat na područjima općina Zrnica i Žepče, odnosno da ova Agencija nije donijela rješenje o prethodnoj vodnoj saglasnosti za izgradnju HE Kovanići.

Na osnovu uvida u dostavljenu dokumentaciju, izjašnjenja JP Elektroprivreda BiH d.d. Sarajevo, očitovanja JP «Autoceste FBiH» d.o.o. Mostar i Sektora za upravljanje vodama ove Agencije utvrđeno je sljedeće:

- Lokalna saobraćajnica projektovana je u dužini cca 500 m, proteže se od sjeveroistoka ka jugozapadu, počinje spojem sa magistralnom cestom M-17 i spojem sa trakom za vangabaritni prevoz, prelazi mostom preko rijeke Bosne i završava na trasi postojeće lokalne saobraćajnice na desnoj obali rijeke Bosne.
- Za izradu projektne dokumentacije za autocestu Vc dionica Poprikuša Nemila, kao i lokalnu saobraćajnicu za Kovaniće uključujući i most preko rijeke Bosne, projektant je koristio zvanične podatke o velikim vodama koje je dobio od «Agencije za vodno područje rijeke Save» Sarajevo.
- Podaci koji su od strane AVP Sava dostavljeni projektantu za izradu projektne dokumentacije za autocestu Vc, dionica Poprikuša-Nemila, kao i lokalnu saobraćajnicu za Kovaniće, uključujući i most preko rijeke Bosne, su najažurniji podaci o velikim vodama za rijeku Bosnu

koji se daju na osnovu hidrodinamičkog modela rijeke Bosne urađenog za potrebe projekta «Izrada Mapa opasnosti i mapa rizika za Bosnu i Hercegovinu», koji je izrađen na detaljnim podlogama dobijenim snimanjem Lidar tehnologijom.

- Poplavne linije dobivene navedenim projektom su integrirane i u posljednju verziju Tehničkih priloga Federalnog operativnog plana odbrane od poplava.
- Prema Očitovanju podnosioca zahtjeva projektant HE Kovanići nije koristio zvanične podatke o velikim vodama rijeke Bosne već je radio vlastiti proračun velikih voda prema kojem su velike vode povratnog perioda 1/100 godina za 530,14 m³ veće od zvaničnih podataka «Agencije za vodno područje rijeke Save» Sarajevo, a kako nije podnijela nikakav zahtjev za vodnim aktima, isti nije verificiran od strane Agencije.
- JP Elektroprivreda BiH d.d. Sarajevo nije pribavila prethodnu vodnu saglasnost za izgradnju HE Kovanići od ove Agencije. Rješenje o prethodnoj vodnoj saglasnosti broj: UP-I/25-1-40-222-4/15 od 19.06.2015. godine odnosilo se isključivo na istražne radove i isto je isteklo po važnosti 19.06.2018.godine

Na osnovu gore navedenog, utvrđeno je da, shodno članu 12. stav (1) tačka 1. i stav (2) Zakona o vodama, sa aspekta sektora voda ne postoje smetnje da se podnosiocu zahtjeva izda prethodna vodna saglasnost za izgradnju lokalne saobraćajnice za Begov i Han Kovaniće od spoja sa magistralnom cestom M 17 do uklapanja sa trasom postojeće lokalne ceste, uključujući i most preko rijeke Bosne, pod određenim uslovima, pa je riješeno kao u dispozitivu ovog rješenja.

Uslovi, koji se trebaju ispoštovati prilikom izrade projektne dokumentacije, a koja je podnosiocu zahtjeva potrebna u postupku pribavljanja vodne saglasnosti i odobrenja za građenje, definisani su tačkom 2. dispozitiva ovog rješenja u skladu sa članom 111. Zakona o vodama, članom 5. i članom 10. stav (3) Pravilnika o sadržaju, obliku, uslovima, načinu izdavanja i čuvanja vodnih akata.

Podnosilac zahtjeva je uplatio upravnu taksu u skladu sa Zakonom o federalnim upravnim taksama i tarifi federalnih upravnih taksi («Službene novine Federacije BiH», broj 6/98, 8/00, 45/10, 43/13 i 98/17).

Uplaćeni su i posebni troškovi prema Zaključku ove Agencije broj UP-I/25-1-40-200-5/21 od 09.06.2021. godine.

Uputa o pravnom lijeku:


Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, u roku od 15 dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Obrađivač akta

Roksanda Školjić, dipl.inž.građ.

Po ovlaštenju
Rukovodilac sektora za izdavanje vodnih akata


Haris Ališehović, dipl.ing.građ.

Dostaviti:

- JP Autoceste Federacije BiH d.o.o.
Ul. Braće Fejić bb, 88000 Mostar
- Grad Zenica – Služba za urbanizam
Trg BiH br. 6, 72000 Zenica
- JP Elektroprivreda BiH d.d. Sarajevo (prilog: dopis)
Ul. Vilsonovo šetalište br. 15, 71000 Sarajevo
- ☞ AVP Sava, ISV-vodna knjiga
- Sektor 40 – arhiva
- Oglasna ploča AVP Sava